

obligatione solvi, tum SS̄mus Dñus Noster facultatem Amplitudini tuæ tribuit dispensationis super eo jejunio, nomine suo, concedendæ.

Precor Deum interea, etc.

Romæ, ex Ædibus Sacræ Congregationis de Propagandâ Fide, die 2 Septembris 1837.

JACOBUS PHILIPPUS CARD. FRANSONIUS, *Præf.*  
ANGELUS MAIUS, à *Secretis.*

### RESCRIPTUM APOSTOLICUM

DE ADHIBENDO IN DIOECESIBUS FÆDERATÆ AMERICÆ LIBELLO DE CÆREMONIIS AB R. P. D. JOSEPHO ROSATI EPISCOPO S. LUDOVICI, ANGLICO IDIOMATE COMPOSITO.

**D**ATUM fuit in Concilio Provinciali Baltimorensi ut Manuale cæremoniarum, quò in sacris ritibus peragendis à Sacerdotibus et Clero provinciæ, quorum plerique ex diversis dissitisque regionibus adsciti varios patrios usus sequebantur, una eademque juxta S. Romanæ Ecclesiæ morem ratio servari posset, typis vulgaretur. Hujus autem libri edendi cura R. P. JOSEPHO ROSATI, Episcopo S. Ludovici, demandata fuit. Igitur Patrum Concilii votis se abundè satis facturum arbitratus est Episcopus S. Ludovici quin novum opus concinnaret: nam id sibi præstandum fore judicavit ut ex latino in anglicum sermonem verteret opusculum jamdiù jussu Benedicti XIII editum, atque à S. Rituum Congregatione approbatum pro minoribus Ecclesiis quæ unius solummodò Sacerdotis et clericorum aliquorum ministerio

utuntur, et ex italico idiomate opus aliud à Sacerdote JOSEPHO BALDESCHI, Romæ, Superioribus approbantibus, evulgatum pro majoribus Ecclesiis; et tandem ex Cæremoniali Episcoporum, quæ ad Pontificales ritus pro Ecclesiis Cathedralibus spectant desumeret, atque in anglicam linguam verteret. Quod reipsâ fideliter et meliori quo potuit modo præstitit, atque opus quod ex jam probatis fontibus haustum nullâ novâ approbatione indigere putatum est, in lucem prodiit Baltimori sub titulo: *A Manual of the ceremonies used in the Catholic Church.*

De hujus autem libri editione rescriptum fuit à S. Congregatione de Propagandâ Fide ad Baltimorensis Archiepiscopum, ut, priusquam typis vulgaretur, authographum Romam mitteret approbandum. Arbitrati sunt procul dubio Eminentissimi Patres Cæremoniale illud novum esse opus, et novos vel peculiare ritus continere in Provinciam Baltimorensis subintroducendos. Sed cum liber nil novi, nihilque à consuetis Romanæ Ecclesiæ ritibus et cæremoniis nedum contrarium, sed nec alienum quidem præ se ferat, et opusculis jam à Superioribus approbatis et Romæ vulgatis, vel excerptis ex Episcoporum Cæremoniali conflatus fuisset, novâ approbatione indigere minimè videbatur, vulgatusque fuit ne Clerus Americanus necessario ad sacras cæremonias ritè obeundas adminiculo diutiùs privaretur. Exemplar hujus cæremoniarum Manualis typis impressum, unâ cum decretis manuscriptis ultimi Concilii Baltimorensis ad S. Congregationem transmissum est, ex quo constare poterit de expositorum veritate; quæ omnia ut à Beatitudine Vestrà rata habeantur atque approbentur, humillimè petunt Archiepiscopus Baltimorensis, ejusque Suffraganei.

EX AUDIENTIA SANCTISSIMI, DIE 17 JANUARIJ 1841.

SSMUS Dñus Noster GREGORIUS Divinâ Providentiâ PP. XVI, referente me infrascripto S. Congregationis de Propagandâ Fide Secretario, maturè perpensis superiùs narratis, et habitâ simul Episcopi supplicantis doctrinæ ac meritorum ratiõne, expositum ab eodem Episcopo factum probavit, et libellum de cæremoniis, sacrisque ritibus ab ipso digestum, atque anglicano idiomate scriptum, in Ecclesiasticorum usum adhiberi liberè posse declaravit.

Datum Romæ, ex Ædibus S. Congregationis, die et anno quibus suprâ.

I. ARCHIEPISCOPUS EDESSENUM, à Secretis.

### RESCRIPTUM APOSTOLICUM

DE ADHIBENDO IN DIÆCESIBUS FÆDERATARUM AMERICÆ SEPTENTRIONALIS PROVINCIARUM COMPENDIO RITUALIS ROMANI, AB R. P. D. JOSEPHO ROSATI EPISCOPO S. LUDOVICI COMPOSITO.

CUM Ritualis Romani exemplaria rara sint et magno pretio emantur in Statibus Unitis Americæ, statutum fuit à Conciliis Provincialibus Baltimorensibus ut denuò typis mandaretur in aliquâ ex eisdem Statibus civitate; et ad minuendas impensas, quæ maximæ sunt in illis regionibus, omitterentur quæ in sacri ministerii exercitio ibidem nunquam occurrunt, ideoque minimè necessaria viden-

tur. Ad calcem autem, et velut in Appendice, ad majorem Missionariorum, præsertim eorum qui vel in anglico sermone, vel in ministerio ipso parùm sunt exercitati, utilitatem, exhortationes quædam ante et post administrationem Sacramentorum faciendæ ut adderentur optaverunt Patres Concilii; et ne quid subreperet in opus tanti momenti, quod S. Romanæ Ecclesiæ in Sacramentorum administratione et sacris ritibus probatissimæ disciplinæ ad unguem conforme non esset, exemplar Ritualis Romæ editi ut authographum adhibendum esse decreverunt. Cura autem hujus editionis demandata fuit Episcopo S. Ludovici, qui Beatitudinem Vestram humiliter precatur, ut id à se præstari possit, præfixo titulo: *Compendium Ritualis Romani ad usum Diæcesum Provinciae Baltimorensis.*

EX AUDIENTIA SANCTISSIMI, DIE 21 JANUARIJ 1841.

SSMUS D. N. GREGORIUS Divinâ Providentiâ PP. XVI, referente me infrascripto S. Congregationis de Propagandâ Fide Secretario, re totâ sapientissimè perpensâ, et ratione habitâ tum consilii à Synodo Baltimorensi Provinciali suscepti, tum R. P. D. JOSEPHI ROSATI Episcopi S. Ludovici doctrinæ ac meritorum, cui res absolvenda commissa est, memoratum in supplici libello *Compendium Ritualis Romani ad usum Diæcesum Provinciae Baltimorensis*, ab eodem Episcopo fieri, et per diæceses Fæderatarum Americæ Septentrionalis Provinciarum adhiberi liberè posse Apostolicâ auctoritate benignè concessit.

Datum Romæ, ex Ædibus dictæ Sacræ Congregationis, die et anno quibus suprâ.

I. ARCHIEPISCOPUS EDESSENUM, à Secretis.